

Christboomschmücke iss was ferr Praktiker

On Heilichowend moins beim Friehtick hott die Fraa zu mir gesacht: Also Honnes, wennde merr nit gleich de Christboom oimache dust, dann mach ichs selber. Wonn willsde dess dann sunnst mache?

Iss joo gut, habb ich zur Antwort gewwe, ess werdd joo aach werklich Zeit. Awwer erstemol will ich de Boom fotografiern.

Was willsden jetzt de Boom fotografiern?, frächt die Fraa, wart doch bisser ferdich geschmückt iss. Awwer ich können nit schmücke wanner nit oigemacht iss.

Ich habb gedenkt, losse babbele, unn bin enaus uff die Terrass. Dort hott de Boom in nem Oomer voll Wasser gestonne, ich habben mettsomt dem Oomer midde uff die Terrass gestellt unn von drei Seite fotografiert, weil dess nennt merr dreidimensional. Dann bin ich onn moin Computer, habb die Bilder oigelese unn habbe e gonz Zeitlong, so villedicht e Stund, mettem spezielle Programm on de Christboom-Bilder erumgeschafft.

Uff oomol steht die Fraa newer mir unn sacht: Konnsde merr grad emol was helfe?

Ei nodierlich, gebb ich zur Antwort, awwer setz dich erstemol newer mich unn guck was ich hier gemacht habb. Dess hier iss unsem Christboom, den kann ich jetzt drehe wie ich will, guck, so siehder von owwe aus.

Die Fraa brummelt: Wer guckden enn Christboom von owwe oo, also weider.

Ich guckse oo, sach awwer nix unn fahr mettem Mauszeicher iwwern Bildschirm. So, mett hier dem Programm kann ich dess Ausseh von dem Boom verännem. Guck hier: „Christbaum Husum“, unn guck - de Boom iss jetzt wie vom Westwind verbooche. Uff de Seit von wo de Wind kimmt sinn die Äst korz unn uff de onner Seit sinnse long, so wies doo owwe on de Nordsee iss. Merr misst dann die Äst uff de oo Seit e Stick abschneide, mett Kordel hochbinne unn ...

Doo knorrt die Fraa: Ess werdd nix abgeschnitte - unn Kordel kimmt merr schunn garnit on de Boom.

Ich guckse oo, sach awwer nix unn fahr mettem Mauszeicher iwwern Bildschirm. Jetzt habb ich hier ooner ferr uns, der heeßt „Heidelberg“ unn iss enn scheene runde. Doo owwe, wo Küchele und Farwe steht, habb ich hiegeschriwwe: 12 rot.

Die Fraa stößt die Luft aus: Erstens sinn unser Küchele golden und zweidens Sinns nor noch elf, oo hosde vorsjohr falle losse unn doo warse kaputt.

Ich guckse oo, sach awwer nix unn schreib: 11 gold.

Die Fraa iss gonz zawwelich. Bei Kerze hosde geschriwwe 10 elektrisch. Diesjohr gibt's awwer nix Elektrisches, die Enkel kumme nit, doo kenne merr richdische Kerze nemme.

Ich sach nix unn schreib: 10 Wachs, drick uff de Maus erum, zeich uff de Bildschirm unn guck die Fraa oo. So Fraa, so sieht unsern Boom aus. Alle goldene Küchele unn die Wachskerze sinn noochem Goldene Schnitt iwwer de Boom verteilt. Gell, doo staunsde? Ich druck dess Bild jetzt farbisch aus, dann kenne merr oofonge mettem Schmücke.

Die Fraa iss uffgestonne unn grinst: Loss dess mettem ausdrücke, erst dusde merr was helfe. Unn sie geht in die Wohnstubb, ich hinnerher - unn was seh ich? De Christboom steht ferdich geschmückt in de Eck vorm Fenster.

Ei ... ei, stotter ich, du hosden joo selwer oigemacht unn schunn geschmückt? Ei ... ich solider doch was helfe?

Doo lacht die Fraa: Du sollst merr helfe e Glas Sekt drinke, uff de Christboom unn uff Weihnächte! Prost unn frnhinhe Weihnächte riu Thenreftikfar Eiern Honnes